

REGIONAL NEWS

HEADLINES:-

1. Mizoram Legislative Assembly inkhawm lo awm tur atan sorkar dan siam tura duan thar The Mizoram Private Placement Agencies (Regulation) Bill, 2025 leh The Mizoram Urban & Regional Development Bill, 2025 te thehluh a ni tawh.
2. Kum 2018 leh 2024 inkar chhung khan Mizoramah chenna in 278 a kang a, kangmei chhuakah hian mi 22 an thi.
3. October 1990 atanga tun tangka kum (2023-24) kal lai mek thleng in Mizoramah HIV/AIDS vanga thi mi 5,332 an awm tawh.
4. New Delhi rel station-a nizana mipui inchilbuaina thlengah mi 18 an thi.

<><><>

ASSEMBLY

Tun thla ni 19 atanga tan tur Mizoram Legislative Assembly inkhawm (budget session) atan sorkar dan siam tura duan thar The Mizoram Private Placement Agencies (Regulation) Bill, 2025 leh The Mizoram Urban & Regional Development Bill, 2025 te thehluh a ni tawh.

Assembly secretariat atanga thudawn danin he'ng bill puitling lut zinga a hmasa zawk hi Labour, Employment, Skill Development & Entrepreneurship (LESDE) atanga lut a ni a, a hnukung zawk hi Urban Development & Poverty Allevation (UD&PA) department atanga lut a ni. He'ng bill pahnih bakah hian Finance department atangin dan siamthat tur The Mizoram Goods & Service Tax (First Amendment) Bill, 2025 chu thehluh a ni tawh bawk a. Higher & Technical Education department-in Mizoram state university bill an thehluh tawh bawk na-in official taka dawn fel a la ni lo ni a hriat a ni.

Official Resolution pakhat lut tawhin, he'ng environment, forests & climate change minister Pu Lalthansanga'n assembly pawmpui tura a putluh tur a nih thu dawn a ni a. Hei hi Parliament-in dan a lo pawm tawh "The Water (Prevention & Control of Pollution) Act" Mizoram assembly in a lo pawmpui (ratify) vena tur ni a thu dawn a ni. Mimal thehluh (private resolution) 85 a lut tawh a. Zirtawpni hi Private member-te puala hun hman thin a nih lai-in tun assembly session-ah hian Zirtawpni vawi khat February ni 21 bak chu Zirtawpni apiang chawlh a nih dawn avangin hun a awm dawn lova. February ni 21-ah pawh hian Prime Minister hlui Dr. Manmohan Singh sunna hun bakah larsap thusawi lawmthu sawina motion sawiho ni tur a nih dawn avangin hun a tlem hle dawn a ni

Zawhna hi House chhunga chhan chi (starred question) 740 leh ziaka chhan chi (unstarred question) 88 a lut tawh a. House dawhkana dah tur lehkhaw pawimawh 5 a lut tawh bawk. Puan tawh angin tun tum Mizoram assembly inkhawmah hian March ni 4 khian finance changtu chief minister Pu Lalduhoma chuan tangka kum thar (2025-2026) atana Mizoram sum hman tur ruahman (annual budget) chu a pharh ang a. Hei

hi budget a vawi 2 pharhna tur a ni a, tun tangka kum kallai hi sum harsatna avangin insawhngheh kum (year of consolidation)-ah ZPM sorkar chuan a puang a. Hmalakna lian tham kalpui an tum lo sa a. Kumin budget-ah hian ZPM-in inthlan hma a an lo intiam angte tihpuitlin theihna tur budget danglam hmuh beisei a ni.

<><><>

MTKP

Mizoram Thalai Kristian Pawl, MTKP Inkhawmpui lian vawi 43-na Lunglawn mual, Krista Pasalthate Run-a Ningani zan a tan chu zanin hian a tiak dawn.

Vawiin Pathianni chawhma inkhawmah Baptist Kohhran general secretary Rev. Dr. Lalbiakliana'n thuchah sawiin chawhnu-ah Jubilee Bible School Principal Rev. R. Lalbiakenga'n thuchah a sawi. Zanin hian (MTKP) secretary Rev. F. Zothankhuma'n thuchah a sawi ang. Zoram hmun hrang hrang atangin Baptist Kohhran thalai rual te fuankhawmin palai riak lut mi 4,301 an awm a, kum 2024 rorèl leh 2025 rorèl inkàrah TKP member ropuina rama kal mi 158 (Mipa 139 leh hmeichhia 19) an awm a, innei tuak 618 awmin, Kohhran Dân Puitlinga innei tuak 401 leh Dân tea innei tuak 235 an ni. Kum thara MTKP hma lâknain Ram tana chawnghei tawngtai neih ni se" tih rêl ani, kum liam ta - 2024 khân Sorkar tha neih theih nân, Pathianni tlâi vawikhat chaw nghei tawngtai huaihawt a lo ni tawh. Kum 2024 - 2025 chhûnga budget atan cheng nuai 18 ruahman a ni a, kum 2024 - 2025 chhûngin cheng nuai 61, sing 2, sang 1 leh 67 hmuh a ni.

Rorel inkhawmnaah, TKP member-te'n thlarau bo man beihpui thlak ni se tih te, MTKP inkhawmpui dawltu tanpuina member tinah kumtin cheng 50 khawn thin ni rawh se tih te leh Rilru hrisel chungchang zirtirna neih ni se, an ti. Mizoram Thalai Kristian Pawl (MTKP) hnuai hian bial TKP 92 leh unit TKP 447 awmin, tun dinhmunah member 50,364 (mipa 30,562 leh hmeichhia 19,802) an awm mek a, kum 2024 atanga member punna hi 1,571 a ni.

<><><>

FIRE

Kum 2018 leh 2024 inkar (kum 7) chhung khan Mizoramah chenna in 278 a kang a, kangmei chhuakah hian mi 22 an thi.

Directorate of Fire & Emergency Services in an chhinchhiah danin nikum (2024) chhung ringawt khan Mizoramah in 40 a kang a, kangmei avanga thi 4 an awm a. Kum 2018 leh nikum inkar chhung khan in 278 kang chhia-in mi 22-in nunna an chan phah a. Kum 2021 khan in kang a tam ber a, in 71 a kang a, hemi kum hian kangmei chhuak avanga thi erawh an awm lo a, kum 2022 khan in 34 a kang a, hemi kum hian kangmei vanga thi an tam ber a, mi 15 lai an thi a. Kum 2019 khan in 28 kangin mi 3 an kanglum bawk. Kum 7 chhung hian kangmei vanga hliam hi mi 42 an awm a, nikumah khan hliam an awm lo tih loh chu kumtinin hliam an awm a ni. Kum 7 chhunga chenna in kang avanga thil kang chhia cheng vaibelchhe 78 leh nuai 32 chuang hu a ni a. Kangthelhtute'n kang mei an thelh mih avanga bungrua leh thil chi hrang hrang hum hi cheng vaibelchhe 196 leh nuai 98 chuang hu niin an sawi bawk a. Kum 2021 khan kangmei avanga bungraw chhia hi a tam ber a, cheng vaibelchhe 26 leh nuai 93 hu vel a kang ral a, hemi kum vek hian kangmei thelh vanga bungraw hum hi tam berin cheng vaibelchhe 83 leh nuai 33 chuang zet hu ni a chhut a ni.

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

HIV/AIDS

October 1990 atanga tun tangka kum (2023-24) kal lai mek thleng hian Mizoramah HIV/AIDS vanga thi mi 5,332 an awm tawh.

HIV/AIDS avanga thi tawh zinga 3,523-te hi mipa an ni a, 1,722 hi hmeichhia niin 87 chu naupang an ni. Mizoram state AIDS control society (MSACS)-in Integrated Counselling and Testing Centres (ICTC) hrang hrang atanga an lakkhawm atanga a a lan danin kum 1990 October atanga nikum thleng khan HIV hri kai hi mi 31,676 an awm a, an zinga 2,553 te hi nu nau pai lai leh nausen HIV hri kai an ni. HIV hri kai zinga 26,364 chu kum 2006 atanga antiretroviral therapy (ART) centre-a inziaklut an ni a. ART centre a inziaklut zinga 23,499 HIV/AIDS natna veite enkawlna (ART) hi an la tan tawh. ART centre a inziak lut zingah hian mipa 15,738, hmeichhia 9,801 leh naupang 823 an tel a. An zinga mipa 13,985 hian ART an la tan tawh a, hmeichhia 8,766 leh naupang 748 te'n an la tan tawh bawka ni.

Mizorama HIV hri kai zingah kum 25 leh 34 inkar tam berin , za zela 41 point 59 a ni a. Kum 35 leh kum 49 inkarin dawtin za zela 27 point 95 an ni a, kum 15 leh kum 24 inkar chu za zela 21 point 58 an ni. Naupang kum 14 hnuai lam an tlem ber a, za zela 2 point 75 an ni a, kum 50 aia upa za zela 6 point 12 an tel bawka.

<><><>

DELHI RLY STATION STAMPEDE

New Delhi rel station-a nizana mipui inchilbuaina thlengah mi 18 an thi a, midang 13-in hliam an tuar bawka. Sorkar hotute sawi danin, Prayagraj-a kal tur rel nghaktute zingah inchilbuaina hi a thleng a, thi zingah hian hmeichhia 11 leh naupang 5 an tel a ni.

Northern Railways chuan thi chhungte hnenah zangnadawmna cheng nuai 10 pek anih tur thu leh hliam na zualte tan cheng nuai 2 sing 5, hliam tenau tuarte hnenah cheng nuai 1 theuh pek anih tur thu a puang a, Bihar Chief Minister Nitish Kumar-a pawhin an state mi thi chhungte hnenah cheng nuai 2 theuh pek an nih tur thu leh hliam tuarte hnenah cheng sing 5 theuh pek anih tur thu a sawi a ni.

Railways chuan inchilbuaina thlen chhan chhuitu tur Inquiry Commt din nghalin chhui hna hi an thawk tan nghal a ni.

President leh Prime Minister-te bakah Railways, Home leh Defence Minister-ten vanduaina thleng hi pawh an tih thu an sawi a, thi chhungte hnenah tawrhpuina hlanin hliamte pawh dam tha leh thuai turin duhsakna an hlan a ni.

<><><>